

LUTRIJA BOSNE I HERCEGOVINE d.o.o.
NADZORNI ODBOR

Na osnovu člana 22. Zakona o igrama na sreću ("Sl. novine FBiH", broj 48/15 i 60/15) i člana 22. Statuta Lutrije Bosne i Hercegovine d.o.o. Sarajevo ("Sl. novine FBiH", broj 95/15), Nadzorni odbor Lutrije Bosne i Hercegovine na sjednici održanoj dana 22.12.2015. godine, donio je

PRAVILA IGRE
„TEXAS HOLD'EM POKER“

Član 1.

Ovim Pravilima reguliše se način učestvovanja u igri „TEXAS HOLD'EM POKER“, (u daljem tekstu: igra/turnir), tok i završetak igre, utvrđivanje rezultata igre, organizovanje turnira te pravila ponašanja tokom igre.

Član 2.

„TEXAS HOLD'EM POKER“ je igra u kojoj igrači igraju jedan protiv drugog, odnosno klub učestvuje samo kao davatelj usluge, odnosno djelatelj igre za koju uzima određeni postotak (RAKE) od svake igre.

Maksimalan broj igrača na jednom stolu je 10 (deset).

Član 3.

Igra se organizuje na odgovarajućem stolu. U igri se koristi 1 (jedan) špil od 52 karte.

Jedna partija se sastoji od 4 (četiri) kruga klađenja (BET), koja se odvijaju u smjeru kazaljke na satu.

Član 4.

Nakon postavljenih obaveznih usluga (SMALL/BIG BLIND) diler svakom igraču dijeli po dvije zatvorene karte (dva kruga po jednu kartu licem okrenutu prema dole) koje samo on može da vidi. Igrači nakon što pogledaju svoje karte odlučuju da li će učestvovati u igri ili ne. Ukoliko ne žele nastaviti igru odbace karte prema dileru, u suprotnom moraju pokriti ulog koji se trenutno traži. Nakon što se svi igrači odluče, diler prvu kartu spali (licem prema dole odloži u stranu), zatim okreće 3 (tri) karte (licem prema gore-FLOP) koje vrijede za sve igrače koji su ostali u igri. Nakon sljedećeg kruga ulaganja, diler spali sljedeću kartu, okreće četvrtu zajedničku kartu (TURN) i slijedi novi krug ulaganja. Na kraju diler spali sljedeću kartu, okreće petu i posljednju kartu (RIVER) te slijedi posljednji krug ulaganja. Nakon što su svi ulozi plaćeni, igrači okreću karte (SHOW DOWN) te diler

utvrđuje najjaču kombinaciju, uzima postotak za klub i pobjedniku daje dobitak. Nakon toga igra je završena i može početi nova.

Igra se može završiti i ranije ukoliko niko od igrača ne plati određeni ulog.

Član 5.

Klub određuje koji su minimalni ulozi za otvaranje igre (SMALL/BIG BLIND). Prije početka prve igre, izvlačenjem najjače karte određuje se igrač pred kojim će biti diler BUTTON. Prvi igrač sa lijeve strane BUTTON ima obavezu uložiti SMALL BLIND, a igrač sa njegove lijeve strane BIG BLIND nakon čega se dijele karte počevši od igračaka sa SMALL BLIND ulogom. Ulozi (SMALL/BIG BLIND) i ostali izjednačeni ulozi čine MAIN POT za koji igraju svi igrači.

Član 6.

Klađenje počinje igrač koji sjedi lijevo od igrača sa BIG BLIND ulogom. Igrač ima tri mogućnosti: da podigne ulog (RAISE), da prati (CALL) ili da odustane (FOLD).

CALL (u prevodu „pratim“) - igrač ulaže jednako koliko iznosi BIG BLIND, RAISE (u prevodu „podižem“) - igrač minimalno povećava ulog za duplu vrijednost BIG BLIND, FOLD (u prevodu „odustajem“) - igrač daje karte dileru i odustaje od igre.

Proces klađenja se nastavlja u smjeru kazaljke na satu sve dok se svi igrači ne izjasne. Ako jedan od igrača podigne ulog (RAISE), svi igrači koji žele da ostanu u igri moraju da prate taj ulog (CALL) ili da ga dalje podižu (RAISE). Podizanje uloga (RAISE) je moguće učiniti maksimalno 3 (tri) puta u toku jednog kruga klađenja. Igrač sa BIG BLIND ulogom ima mogućnost da nastavi igru bez dodatnog uloga (CHECK), ali samo u slučaju da niko od ostalih igrača nije podigao ulog (RAISE). Ukoliko jeste, onda BIG BLIND igrač mora da se opredijeli za jednu od tri opcije: CALL, RAISE, FOLD.

Član 7.

Onog momenta kada svi igrači izjednače svoje uloge ili odustanu, na talon se stavljaju prve tri zajedničke karte (FLOP) okrenute licem prema gore, tako da svaki igrač može da ih vidi. Igrači mogu da koriste ove karte u kombinaciji sa svojim kartama kako bi napravili svoju poker ruku (poker ruka sadrži pet karata). Tada započinje drugi krug klađenja.

Član 8.

Nakon što je drugi krug klađenja završen i ulozi izjednačeni diler na talon okreće četvrtu zajedničku kartu (TURN) i slijedi treći krug klađenja.

Član 9.

Po završetku trećeg kruga klađenja i izjednačenja uloga, diler okreće petu i posljednju zajedničku kartu (RIVER) i započinje posljednji krug klađenja. Ukoliko je

u igri ostalo više od jednog igrača, oni pokazuju svoje karte (SHOW DOWN). Igrač sa najjačom kombinacijom pobjeđuje i odnosi ulog, a kada dva ili više igrača imaju kombinaciju karata iste jačine, ulog se dijeli na jednake dijelove među njima (SPLIT POT).

Moguće je da je pet zajedničkih karata na stolu istovremeno i najjača kombinacija i u tom slučaju svi igrači koji su ostali u igri dijele dobitak.

Član 10.

Svi igrači na stolu igraju ravnopravno bez obzira koliko novca u žetonima trenutno imaju ispred sebe. To znači da igrač koji nema dovoljno žetona da prati traženi ulog može uložiti sve svoje žetone (ALL IN), ako su u igri dva igrača, razlika između prvog uloga i manjeg uloga (ALL IN) se vraća prvom igraču, a ukoliko je više igrača prave se zasebni ulozi (SIDE POT) za koje igraju igrači koji imaju žetone za dalje klađenje.

Član 11.

Poker je individualna igra. Sve igračeve odluke tokom igre moraju biti donesene bez savjeta i ometanja od strane drugih igrača ili promatrača. Igrači ne smiju otkrivati sadržaj svojih karata, davati savjete ili kritikovati igru ostalih igrača dok je igra u toku. Igrač žetone stavlja u jednom potezu (pravilo ONE MOVE).

Ukoliko RAISE nije najavljen, žetoni stavljeni u POT smatraju se kao CALL. Žetone unaprijed najavljenog RAISE-a igrač može staviti u više poteza.

U slučaju neparnog broja žetona kod podjele pota, višak žetona daje se igraču lijevo od BUTTON-a.

Karte se mogu mijenjati prilikom promjene dilera ili u slučaju oštećenja karata. Karte se ne mijenjaju na zahtjev igrača.

Usmena najava poteza je obavezujuća i ne može se promijeniti.

Član 12.

JAKINA KARATA: od najslabije kombinacije prema najjačoj:

Jedan par (dvije jednake karte),

Dva para (dva puta po dvije jednake karte),

Triling (tri jednake karte),

Skala (pet karata složenih po redu, npr. 2,3,4,5,6),

Boja (pet karata jednake boje),

Ful (kombinacija tri + dvije jednake karte),

Poker (kombinacija četiri jednake karte),

Skala u boji (pet karata iste boje složeno po redu, npr. 4,5,6,7,8),

Royal fleš (skala u boji od 10 do A's).

Član 13.

Riječnik Texas Hold'em pojmova:

DEALER - djelioc karata,
DEALER BUTTON - pozicija koja označava od kojeg igrača počinje dijeljenje,
CALL - plaćanje uloga,
FOLD - odustajanje od igre,
CHECK - nastavak igre bez ulaganja,
BET - ulog,
RAISE - povisivanje uloga,
RE-RAISE - povisivanje nečijeg povisivanja,
FLOP - prve tri zajedničke karte,
TURN - četvrta zajednička karta,
RIVER - peta zajednička karta,
SHOW DOWN - otkivanje igračevih karata,
SMALL BLIND - obavezni mali ulog,
BIG BLIND - obavezni veliki ulog,
MAIN POT - zajednički ulog,
SIDE POT - ulog sa strane,
SPLIT POT - podjela dobitka,
ALL IN - kada igrač ulaže sve svoje žetone,
KICKER - najjača karta u višoj ruci mimo kombinacije,
BUY IN - minimalna količina novca potrebna za učešće u igri,
MISDEAL - poništeno dijeljenje.

Član 14.

SMALL BLIND - 1 KM BIG BLIND - 2 KM

POT:		RAKE:	
OD 3 KM	DO 15 KM.....	0 KM	
OD 16 KM	DO 50 KM.....	1.50 KM	
OD 51 KM	DO 100 KM.....	3.00 KM	
OD 101 KM	DO 150 KM.....	4.50 KM	
OD 151 KM	DO 300 KM.....	7.00 KM	
PREKO 301 KM	10.00 KM	

Član 15.

Direktor zadržava pravo da svojim Uputstvom naknadno detaljno utvrdi sve pojedinosti vezane za ovu igru.

Član 16.

Ova pravila čine sastavni dio Pravilnika o radu Kasino kluba Lutrije BiH, te se moraju na odgovarajući način učiniti dostupnim igračima i radnicima u Kasino klubu.

Član 17.

U pogledu načina izmjena i dopuna, te stupanja na snagu i primjene ovih pravila postupiće se u skladu sa odredbama Pravilnika o radu Kasino kluba Lutrije BiH.

Član 18.

Stupanjem na snagu ovih pravila prestaju da važe Pravila igre „TEXAS HOLD'EM POKER“, broj: 01-287-15VS-3/10 od 16.02.2010.godine.

Član 19.

Ova pravila stupaju na snagu danom donošenja, a primjenjivat će se prvog narednog dana od dana objavljivanja istih u jednoj od dnevnih novina.

Broj: 01-57-2308-10/15
Dana: 22.12.2015. godine

P R E D S J E D N I K

Miroslav Ćorić, s.r.